

长离阁集

王采薇

文硕阁

wenshuoge.com

目录

关于我们	3
长离阁集目录	5
长离阁集一卷	6

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

长离阁集目录

长离阁集一卷（诗七十一首词一首）

燕燕于飞 山中作 自君之出矣 山中忆吳如霞姊 复与季述夜起视月同作 池上书寄薇隐
望夫石 香草河舟晚 晓步 梦游 秋胡 兰芝曲 华清曲 昆灵曲 前楼 句容斋舍 寒食吟
秋夜荅季述 梦天 春眠曲 夏行曲 秋望曲 冬坐曲 木兰词 春暝曲 离居曲 霁行曲
病中忆归效简文卦名诗 晓起效徐陵体 早起忆弟妇 铜雀台 不眠 曲渚 山空 雨夜
病卧得季述诗 送春 山夕 幻梦 初春 山夕 梦起步后园 半领和薇隐韵 舟次 有感 水宿
九月十四日舟由丹徒夜半与薇隐乘月登岸行三里作 寄薇隐次韵 山斋病起忆亡姊
荅薇隐复次前韵 悼姊 寄季述时客和州 空室 山夕 蒋墅舟次和季述下第有作 七夕悼姊
忆别和薇隐 晚立 二月十七日柬薇隐 得薇隐从金陵寄一书 三月三日 梦起 寄父
空楼哭亡姊 春夕 秋夜不寐 哭姊 卧病 向夜 偶成 归宁后寻亡姊故居 梦中作 又 幽梦
寄季述 回文 和薇隐韵（醉花阴） 附小传 事状 墓志铭

长离阁集一卷

毘陵王采薇

燕燕于飞

流光何晖晖，晖晖乱春日。独燕衔愁来，悬飞镜池绿。池绿何多情，堂空复孤惊。羽丰离其窠，哺足辞所生。回身顾新侣，得食哀哀鸣。

山中作

夜松何蒙蒙，月小飞不起。知有抱瑟人，垂光碧帘底。露气明曲岩，花光照虚夜。一片白云声，飞泉隔烟泻。

自君之出矣

自君之出矣，两瘦不相识。炯心如流丹，掬赠焉可得。

山中忆吴如霞姊

帷灯照宵衾，涧水闻夜室。天静远烟摇，华云度流月。幽栖亦心好，思子方首疾。忆昨寄远书，凄凄泪盈帙。生愁一何滋，少乐从是毕。虚房想清燕，蛾响落清瑟。何由寄新吟，慰我中似结。

复与季述夜起视月同作

虚扉浹宵开，凉灯照幽素。肃肃鸦不翻，团团云稍去。蛩底闻行泉，篝黑辨浮露。外役于此捐，中疴自兹愈。循阶桂华歇，交户瓜蔓吐。徒乖有怀衷，未协长往趣。亦有同心人，斯情积难诉。

池上书寄薇隐

日暝幽眠凉，流云涨岩曲。相思寄长风，动汝窗外竹。池头孤行薄罗冷，却忆把书双对茗。受露衰荷散叶香，临溪独鸟矜毛影。

望夫石

妾颜初如花，妾心已如石。定情双妍姿，不忍君归见衰色。妾颜当雕心不移，妾身亦化君始知。冰为肌，草为鬓，山头无人寄君信。妾意浅，君心深，恐君复化填海

禽。冤禽来衔石方动，不作巫云入君梦。

香草河舟晚

疎林无人叶飞影，暝渚归帆贴空冷。断岸泥多鸭爪痕，乱山钟到鸦巢顶。邻舟袅袅歌入烟，明月已让星悬天。来风吹衣恐仙去，白道还疑翠微路。

晓步

晓色凝不来，鸦啼去何许。茶烟生溟蒙，孤桃索人语。幽亭无人拓，窗徧一桁碧。山低未见，日气如烟。聚水心雨光，满地流花片。

梦游

一星迷蒙远溪路，出碍荒烟入横雾。峡中泉气冷逾秋，峯底天光碧疑曙。僊皂飞空蜀江小，露雨香挑觉春早。琼楼贝阙摇灵珑，衣翠霞红各漂眇。流云为车鹤衔轡，心着游丝不堪系。断桥围水水压墙，双燕争魂堕空砌。

秋胡曲

珂声琅琅踏春疾，立处兰风下林末。柔桑落臂弱不收，花颊流红射朝日。冰缣夜断不愿金，妾泪自堕因蓍簪。仓庚少妇能销妒，盘石男儿不镇心。

兰芝曲

唬鬟垂云粉黄落，夜半严妆起幽阁。已分单栖似伯劳，剧怜薄命逢姑恶。红桐掩坟秋骨灰，阿母泪落心当回。莫随怨魄填波去，合化幽魂促织来。

华清曲

玉鱼如冰冷犀齿，雪色灵禽作仙使。石扇龙环守别魂，不似蟾宫敞千里。蓬莱山高无落虹，钗盒夜泣翡翠空。雨零石磴荒夫草，网暗宫门缢女虫。

昆灵曲

宫槐眈眈向清曙，蠹粉梁空燕无主。玉芪不动踏堂尘，帘底菱花学睂语。蝉丝细帐虫织成，秋簟夜碧唬潜英。翻翻小蜨随帟幅，迹迹衰梧作履声。

前楼

前楼交树檐柯徧，后户穿窗月轮见。楼空贮愁愁不升，飞露着镜如吹镜。长天无鸿断来信，自祷夜风吹梦近。一夕参差隔院声，梨花飞白春人鬓。

句容斋舍

山莺破晓第一声，绿萝雨落如珠缨。连松犹合夜泉响，残月不避晨光明。晨光胧胧逗深幕，开户持书候空鹤。零云一片吹不开，却挂碧潭潭上阁。

寒食吟

花枝扬扬柳宛宛，不动陂塘水芹短。破冢孤梅掩骨深，败墙小蜨寻魂远。红鲜绿穉随春天，咽咽蜀禽飞不高。纸钱挂树雨淋尽，满地暝烟开鬼桃。

秋夜荅季述

金炉无香道书朽，隔枕秋声下残柳。琐窗睂敛愁寄笺，悬梦已入浮云边。蕉廊风多独吟处，落叶幽魂各来去。寒虫一夜唳渐低，露白星黄共争曙。

梦天

碧阑十二花无数，桂叶低笼若青雾。蕊宫谁遣别魂游，只有青禽送来去。波离扉薄不上关，对语月姊琼楼闲。银河珊珊泻声小，手弄白云天下晓。

春眠曲

簟梢压户帘纹细，空色湖光着山腻。莺眠树杪弄垂丝，蜨上花鬓醉芳气。琉璃隔香香暗流，薇帐梦醒闻轻钩。空阑尽日无人影，日炙落红蔫不收。

夏行曲

白波叠玉荷如钱，绡户织月疑空烟。青虫挑鬓受花露，丹鸟入幕栖芸编。疏桐垂阴下苔井，雨去新蝉一声警。兰堂夜静还独开，小玉眠凉抱枝影。

秋望曲

花梢凝霜散寒蜨，檐角垂丝挂零叶。南溪别处渚连空，瘦绿愁山照波湿。细烟青锁雅尾长，淡日半入幽蟾黄。虚房未暝吹镫坐，露眼风踪吊曲廊。

冬坐曲

曲琼押幔香丝起，酒波微皱夜及子。花蟬心朽不得仙，粉蛻空僵碎黄里。风棖胧胧通月泽，屏外鸟哢瘦林直。已罢怀人更忆亲，冰红泪落兰膏碧。

木兰词

生男勿喜欢，生女勿悲酸。女生当县弧，女足亦莫双行缠。不见木兰女，代爹征可汗。出门望行尘，日色青漫漫。顾笑诸少年，泣行（胡郎切）何洿澜。流尘凝双睂，飞露缀两肩。闺中何能贵，不及铁衣锦鞞黄金鞍。闺中何能豪，不及衔霜度雪听风湍。蛇矛丈八气决前，精感白日昏沙烟。生还见天子，天子动色言，要金佩玉作纤步，绰约顾影惊千官。上堂拜父母，父母疑重看。开帘觅我故时镜，手脱长剑分双鬟。君不见东家女儿好颜色，朝贫穿针莫贫织。西家女儿衣盈箱，自矜嫁得金龟郎。男儿封侯妾何有，要取黄金自悬肘。

春暝曲

青杨分鬟下抛地，暝色春空绿膏膩。怨土成云葬玉京，虚帘燕落相思泪。

檐铃细语春眠回，扑树晚蜂娇不归。园扉斜开石泉冷，笛韵吹愁出苔井。

黄月如星惨一钩，杏花楼暗藏人影。

离居曲

露华网户参差光，碧筠粉薄如栖霞。凉堂下帘帘率地，素手无分玉如意。

燔膏作鐙檐不红，夕抚绿绮空窗中。一声凉破楚天碧，去雁叫影思离鸿。

南山点苔愁向晓，独客臃臃涉长道。楼前月浪卷衣来，梦里江声隔帷小。

霁行曲

幽窗无人竹枝重，晴色风林散雅梦。曲沼圆文上薄冰，差差晓日鱼吹动。

黄编落枕愁独眠，下阶自惹花间烟。金蟾锁春不得住，已入暗户生苔钱。

南云沈沈雁慵度，凤纸回文积筐蠹。已是春衫染泪来，乱红更见鹃啼处。

病中忆归效简文卦名诗

雁小过楼迷，流云复满溪。萝蒙才上月，竹比已开扉。
蜡照怜妆损，虫吟识梦离。旅魂宵不定，革带日仍移。
病渐因霜痼，心恒似叶危。何时升画阁，言归妹把衣。

晓起效徐陵体

春镜动春烟，春林绿半天。帘低压枝卷，窗迴对禽眠。
书帙蝇弹纸，琴床风触弦。辞衾惜香在，扫径待花蔫。
研墨污罗袖，看鱼落翠钿。谁云厌长日，终是惜驰年。

早起忆弟妇

日华生曲沼，昨梦去东轩。露雨出深草，禽花杂一园。
妆馀唯拂卷，绣里更看山。萱叶如长带，蘋英似小钿。
何时话离恨，双笑北堂前。

铜雀台

日莫碧空杳，望穷如有存。云痴想歌态，月转见床尘。
草暗露凝迹，树斜烟曳魂。此中君不起，何许泣能闻。
可惜分香女，都无殉没人。

不眠

不眠虚静夜，忆别损清娱。月芒生镜匣，露颗杂帘珠。
径坏转鲜叶，岩寒尚碧芜。息檐唯旅燕，映树有垂蛛。
夜夜梅枝下，迎寒减病躯。

曲渚

曲渚斜生白，疏星动欲昏。四更桃叶影，一缕杜鹃魂。
断雨还零砌，虚帘自打门。萧萧庭竹短，都作泪花痕。

山空

山空收夜气，墟上露千星。岭月流尘几，窗风乱道经。
鹤随云到户，虫与叶栖亭。是夕怀萧史，幽行遍绿汀。

雨夜

响急衣砧合，声沉漏箭随。黛痕侵故壁，香影聚重帷。
碧簟眠伤骨，红镫病压眉。数株门外柳，苦伴暝禽垂。

病卧得季述诗

病减无三日，春归又隔年。能传闭关句，来破拥衾眠。
落雨时连蒂，喧禽不出烟。开帘放香篆，应始觉晴天。

送春

如何送春处，不见有春归。落雨丝阑住，残花蝶斗飞。
黄骊正漂荡，碧叶空参差。徒伤持桂酌，况复易裘衣。

山夕

草虫门径远，一路入溪烟。月满无人地，钟残有雁天。
心孤闻动竹，衣冷近流泉。欲觅乡关梦，楼空独上眠。

幻梦

几叠春山路，谁分碧扇开。露光生竹石，云气杂楼台。
鹤度凉潭去，钟穿薄雾来。微茫天水阔，我梦正寻梅。

初春

晓镜慵梳饰，幽窗梦破迟。梅梁波反影，芸帙曙通曦。
花逐调琴指，莺随入镜枝。十分春欲去，惆怅未成诗。

山夕

将暝室生白，松花满石阑。碧潭琴影瘦，黄叶客衣单。
网露迷兰径，茶烟惹竹竿。琼枝空忆梦，挑饭不能餐。

梦起步后园

兰香流一涧，桑烟染半岑。雨开残照影，花动小楼阴。
蜂晚能喧梦，尘凝不上琴。何时识芳草，眠里定幽寻。

半岭和薇隐韵

半岭幽居好，疏谈向夜分。剑明疑有月，香细欲生云。
新酝皆松术，清娱有典坟。湘帘池上动，苦露湿行裙。

舟次

风斜舟近岸，竹外复芦中。树裊屏中绿，荷愁镜浦红。
残霞犹眇莽，出月已空濛。莫惜横烟住，孤吟荅露虫。

有感

不见画钗处，惊看过月痕。帘斜生鸟影，屏小贴花魂。
风瑟埋尘冷，蛟绡湿泪温。石床苔掩鬓，黄蝶欲栖门。

水宿

冥冥堤畔路，草草别时家。碧影沈湖月，红心上冢花。

鐙微还下雁，钟冷不惊鸦。薄醉和衣宿，扁舟入树斜。

九月十四日舟由丹徒夜半与薇隐乘月登岸行三里作

幽行已三里，村落半摘扉。只鸟时依树，孤萤不上衣。

月高人影小，潮定橹声稀。沿水星星火，归惊宿鹭飞。

寄薇隐次韵

春牖对芳林，朝阳上绮衾。户低交叶暗，径小受花深。

金错循离恨，瑶珰镇别心。欲谙芳草路，因梦寄新吟。

山斋病起忆亡姊

涧响当宵定，岚光入户深。馀云泛幽石，碎露满疏林。

竹院弹棋断，松房沸药闻。重泉埋玉客，谁识正思君。

答薇隐复次前韵

香雾斜横帐，衣绵重压衾。梦听啼鸟乱，愁与落花深。

易尽千行札，难分一缕心。相如情若固，何用白头吟。

悼姊

残夜一禽惊，鐙幽梦转明。把书寻泪色，掩幔想衣声。

微病花全发，深眠月暗行。蜀弦尘里断，已任指尖生。

寄季述时客和州

空院题诗对碧莎，华年作别叹蹉跎。梦馀捲帐人疑在，书去寻愁语转多。

晓岫入云飞断雁，夜鐙照雨落残蛾。空江无复怜才客，此夕租船忆啸歌。

空室

蠹壁蛛丝掩绿琴，碧苔红叶拾遗簪。露寒花带啼痕长，月小帘围梦影深。
条脱寸宽辞病臂，秋千伴远系春心。幽梅一树还窥户，似约幽人到绿岑。

山夕

碧帘不卷映风萝，十日清愁独抱疴。寒浦带星垂似露，夜风吹月动如波。
入楼叶趁人踪断，隔户梅疑梦影过。莫更砧声近空院，女嫠宿草遍坟科。

蒋墅舟次和季述下第有作

一夕霜花湿鬓青，湍声出渚棹初停。病中龙具和衣泣，愁里鱼箫带梦听。
隔浦叶多飞似鸟，入林灯小远于星。从君湖海幽寻志，何日浮家去杳冥。

七夕悼姊

奠果穿针听曲街，瘦林斜月闇虚斋。愁年不共生年短，死日方知别日佳。
风烛作花摇怨影，露萤随泪堕孤怀。故床针盒飘零在，望有吟魂到玉阶。

忆别和薇隐

阁中羁客泪盈醪，湖上征人草染袍。小树雨寒蜂去静，乱花风压燕衔高。
几年叹逝閒清笛，百日伤离阁彩毫。波影连天柳迷路，幽行惟有梦魂劳。

晚立

旋整罗衣候月斜，萧然人影出晴纱。烟中紫燕相思语，霜里红蕖独自花。
住久小楼因对岭，断来清梦又无家。曲阑幽话何时展，一笛西风万树遮。

二月十七日柬薇隐

五日春阴不启关，封书始此整幽鬟。离愁作雾疑沉水，晓病如烟尽著山。
泪里镜开花四照，梦馀帘动燕孤还。锦囊自续新吟满，何日凭栏与共删。

得薇隐从金陵寄一书

尺幅吟笺照泪眸，半窗斜日梦孤舟。愁如天远还窥帐，病与云亲不下楼。
湿翠雨收侵砚匣，落红风飏上帘钩。青山到处应相忆，除是征人醉里游。

三月三日

绿杨楼角带栖鸦，欹枕炉声正忆家。吹梦夜风先到树，弄愁寒雨不妨花。
虫依香影垂帘网，蛾怯晨光堕帐纱。我已离愁懒春禊，径泥何处又鸣车。

梦起

梦醒思家望翠微，幽苔染影上罗衣。寒天细竹人孤倚，斜日空檐燕对飞。
碧岭叠来乡路断，玉梅枯尽旧颜非。夜堂疏磬疑禅寂，冷水閒云照合扉。

寄父

疏鐙残雨计宵程，贫日偏伤远别情。薄宦十年徒三黜，衰颜千里更孤征。
饥犹励学怜诸弟，弱未酬恩厌此生。一夜趋庭梦言笑，晓窗垂泪听春莺。

空楼哭亡姊

绿槐影里露幽扉，寂寞楼头落照微。此地独来空绕树，几时别去更牵衣。
风停虚幌神灵在，雨坏幽苔泪迹稀。谁语愁心向梁燕，故巢莫作一双飞。

春夕

已罢雠书怨夕遥，更闻疏竹度邻箫。灵珑鸟语惊帘押，寂寞香丝绕画绡。
一院露光团作雨，四山花影下如潮。伤离不为何郎句，病久东阳自损腰。

秋夜不寐

独掩幽窗卧不成，香心冷死粟肌生。五更霜月欺鐙影，一树风鸦续雁声。

短草积烟归梦怯，长林挂叶晓魂轻。鞠阑半曲还扶病，水玉帘间看启明。

哭姊

断甲遗琴委故床，思君独旦不成装。花边风起肩谁拥，月里烟销影更凉。

残墨尚明笺上泪，馀膏空落枕前香。翠屏一角栖歌哭，祇恐猿闻也断肠。

卧病

漠漠凝尘掩镜台，药烟如雾梦初回。扁鱼影里窥花尽，惊鹊林中觉月来。

故里信疏抛旧翰，夜窗语冷见残杯。长卿亦有怀乡恨，百日青琴欲上苔。

向夜

树影入清汉，蝉声动小楼。凭阑弄清笛，微月在钗头。

偶成

竹叶鸣纱牖，虫声杂锦梭。帘长镫焰小，山乱月明多。

归宁后寻亡姊故居

痛定犹开镜，啼多不整妆。红苔黯空壁，飞电夜明房。

梦中作

欲暝疑将曙，凉春似早秋。青山独归处，花暗一层楼。

梦中作

草长兰弄影，莺语蝶飘魂。一亩凄凄水，斜阳却在门。

幽梦

幽梦随云细细生，阑干经雨入流萤。夜堂独自花迷影，碧汉风吹雁出城。

寄季述

嫩寒帟幕雨廉纤，衾上春衫逼曙添。试束晨妆拓幽阁，小红齐见破梅尖。

回文

壁上虫笺旧，炉香近帐纱。

石幽和瑟冷，衣薄引衾加。

隔院过蜂蝶，分窗对竹花。

席长横帙乱，帘侧挂枝斜。

客思愁来晚，林空满立鸦。

和薇隐韵

嘹唳归鸿惊社后。旅馆乡心逗。梦入晓云飞，绿遍天涯，不认门前柳。

露桃影里人非旧。春也应难久。风日又清明，独对残红，寂寞帘垂昼。（右调醉花阴）

伯舅渊如先生配王夫人才慧早世，曾刊薇阁偶存一卷，得诗词杂着三十八首。毕秋帆。尚书刊吴会英才集。复于伯舅雨粟楼诗后，附录夫人诗名长离阁集较旧本，增损不同，盖选时各有去取耳。今年春庆为伯舅搜辑遗集，自夏徂秋，编成付梓，将有中州之行，外舅南麓先生更属编次，长离阁集，乃以薇阁偶存。及吴会英才集所选者，互相校订，合为一编。凡诗词杂着七十八首，附刊冶城遗集之后，袁简斋太史为夫人作墓，志称其诗，哀感顽艳。丁当清逸王菰山先生为作小传，并摘佳句有寄。父云：饥犹厉学，怜诸弟，弱未酬恩，厌此生咏木兰云：男儿封侯，妾何有要取黄金自悬肘步月云：只鸟时依树，孤萤不上衣。秋夜云：五更霜，月欺镫影，一树风鸦续雁声。春阴云离，愁作雾，疑沈水晓病如烟尽着山悼姊云：把书寻泪色，掩幔想衣声。春夕云：一院露光团作雨，四山花影下如潮。七夕悼姊云：愁年不共生年短死日方知别日佳舟次云：隔浦叶多飞似鸟入林镫小远于星。有感一律云：不见画钗处，惊看过月痕。帘斜生鸟影，屏小贴花魂。凤瑟埋尘冷蛟，绡湿泪温石床苔掩鬓，黄蜨欲栖门皆已载入集中。又有感云：名香一缕当帘出，故札千函向月开。入梦已迷前，度草返魂惟有去年梅。惜首尾不全集中未载，姑附录于简末焉。伯舅号季述，一号薇隐。兹编题内，或称季述，或称薇隐，皆依原本。夫人喜读汉晋书，尤工小楷。尝见夫人为伯舅手录诗草一册，绝似永兴家法。因题句册后云：手写新诗墨，细研永兴楷法尚依然名山各有千秋业偕老何须说百年以志景仰之诚且纪实也。嘉庆戊寅秋七月，从子壻龚庆谨识。

亡女王采薇小传

亡女采薇，字玉璫，余第四女也。其生母方娠，时梦月旁星光熠，熠或告曰：此四女星也。欲手摘之，倏不见矣。及生，姿质清弱，周睟病几危。八岁许，同邑孙文学星衍。女既长貌端丽，性柔婉，耽文史，手不释卷，尤工小楷，好吟咏，余以诗非女子所宜，遂秘之。雅爱洁静，每明窗净几，读书临帖，煮茗供花，翛然物外，时翻道家，书志神仙余切戒之则止。而夙根灵慧，时有出尘之思。性至孝，得嫡母白孺人欢心，迄于既嫁，犹依恋不舍，待人接物，和顺恭敬，余钟爱之，每有拂抑嗔怒，对之辄解，人以为吾家娇女，虽大家左芬，不是过也。年十九，赘壻星衍于家。次年壻补博士，弟子员壻，聪颖工诗，倜傥不羁。邑中时有毘陵才子之目，然颇恃才，不屑屑为经生吾伊态，或纵酒放歌，女数箴劝之。甲午秋闱报罢，女颇抑郁。从壻之句容官舍舅姑俱称美之，而女以乍离膝下，又值余三女，适呉者暴亡，女悲恸欲绝，自顾孱弱，亦恐寿命不长，居常悒悒。乙未九月，生女阿灵得嗽疾，体渐羸怯。丙申七月归，宁病益剧，竟于十月二十三日卒。距生癸酉九月十九日，得年二十有四。先是八九月间，余谒选都门，知女病窃忧之。然以其贞静闲淑，冀可不致夭折。自冬徂春，不得家，书心瞽乱，若有所失。今年二月初得恶耗，计歿时逾百日矣。壻已于十一月中葬女于横塘乡新阡，余不获抚棺一恸情何能已闻。殓时，颜貌如生，手足温软，似解脱者。今年春有能为扶鸾术者，乩词称女，住忉利东宫，掌上界书，并有寄外八绝，其事甚异，或有鬼物凭之耶？抑宿根之说，不尽荒唐耶？余自庚寅岁，适许之次，女亡甲午，三女继之。今四女又继之。七年之内，连丧三女，哀何如也？前明呉江叶太常天寥两女，昭齐琼章，皆以才歿。太常作窃闻记，传其事，阅者哀之。余三女似昭四女似琼，近闻乩仙，事又适相类女所配。既得才士，而天不永，其年，奚忍令其湮没，无闻与流萤落叶同归渐尽也。歿后检故笥，得诗词杂着，若干首付梓。伏冀大人先生，矜其蹇薄，锡以挽谏，使幽泉弱息，得言而传，则鄙人之哀，亦以少释云尔。武进王光燮菰山氏，和泪笔于京邸。

诔赠夫人亡妻王氏事状

夫人姓王氏，名采薇。父光燮，乾隆元年进士宜黄县知县，赠奉政大夫、兵部主事。生母黄氏弟五人，姊三人，妹一人，一弟一妹，同母生夫人。少以姿质端丽，尤为父钟。爱外舅之择壻，必推年命，当发科与否。或以子生年月日告外舅，推而善之，亟介戚好言姻事。时予生数龄，家君远出，大母许通聘。以乾隆三十六年冬十二月，年十九，成婚于甥馆。越四年，随余归句容学舍。四十一年，以疾归宁，卒于十月二十三日距生。乾隆十八年，得年二十四。凡生二女，后皆殇始外。舅之在令廨，以文学饰，吏治不延幕，僚事皆办多燕闲。其教女一如教子。尝自言：吾女慧，或过于男，故夫人姊妹俱识字能书既婚数日，夫人属余填词，并约围碁，余皆未学。颇心媿之。后遂为小词酬夫人，而卒不能对。弈夫人终日持一编书在室教。其幼妹时时临帖好虞，永兴楷法，或为余录诗，至今有存篋中者，尝言唐五代词，

率可倚声被之箫管春余夜静，辄取李后主帘外雨潺潺，词按箏吹之令，余审听至流水落花人去也。天上人间闻者欷歔。其后写夫人遗影为落花流水图，以此既归句容，时余大母在堂，两亲爱子，息无苛礼。定省之暇，不事针黹。夫人好絮除几席，余每陈书满案，而出比入室，则夫人为整齐之偶，得许氏说文，与余约日识数十字。久之，予遂通小学。山斋有桐桂古柏冬寒月皎，对影萧瑟，或出户闲吟，或焚香开卷，论说史事，俱有神识，不信佛书邪鬼之语，不视稗官小说。既得疾，终夕嗽不止。又痛其姊先卒自疑，以产致疾，将不起为诗词多凄楚音有词云：归梦到江南，绿遍天涯不认门前。柳又为诗云：五更霜月欺灯影，一树风雅续雁声。余惊以为不祥，乃起对落英叹曰：人常惜花，早谢，红颜出世不胜衰颓耶？病甚急。归母氏因送之至里门，遂不起。临歿，遗言：勿厝棺佛寺，故余亟择地乡郡之横塘乡权葬焉。越十二年，余以翰林改官尚书比部郎例，赠宜人。及嘉庆元年，余出官山东兗沂曹济道例赠恭人，皆请赠先世今年以予官督粮道，加三级，赠夫人。夫人。卒时，余曾为事状，年久失其稿。有袁太史为夫人墓，志已属梁侍讲同书写刊于石顷，因整理家乘，复记忆遗事，撰次大概以示后人云孙星衍状。

孙薇隐妻王孺人墓志铭 钱塘袁枚

孙薇隐秀才诗才倜傥能为昌谷玉川家数予爱伟之今春二月以其亡妻王孺人事状及诗索予铭幽予读其乐府诸篇哀感顽艳丁当清逸故知完山之鸟无异吭之鸣云和之笙有双管之奏宛其死矣土也婆娑彤管既淹元石斯耀谨按孺人姓王名采薇宜黄令光燮公女也有天绍之丽姿愔愉之修美天女九相灵芸三绝年十九归秀才秀才故食贫者赋感昏时以帛拜代香纓孺人不槩于心能鉏其色守成汤嫁妹之诚捐夏禹修容之粉调言筴巢咏之器治干{干櫟}馈食之笾威姑以下愉愉如也每至玉女沙凉金虫灯小钗横三簪髻妥半蟬孺人焚衙湿之香展排比之卷或抽觴以启颜或论古而交谪诵灵飞之篇目王母心惊成顰鉴之图章南海纸贵秀才爱玩贤妻有终焉之志匪云嘉耦直是吟朋且其神识尤异侪辈尝读王章传曰牛衣妻自贤柰沮仲卿上书终是恇怯女儿又对落英叹曰人当如渠蚤谢虑有怜者何俟颜侵才舍恒干耶味其言直以形骸为桎梏昼夜为一致采云留影昙花爱空宜其拂衣行矣便登女{女坐}之邱执手奄然难挽灵妃之步病成解{解亦}熊失嫵妍卒年二十有四秀才开华鎡之故匣见都肤之旧痕哀思夕流愤泉朝涌遂乃诣宛若请神君执鬼中玩仙牒知孺人故是兜率宫掌书者虽迹涉幽渺庄士不言然浴羲女于甘渊奔纯狐于月窟乃自古记之秀才钟情语怪以妄塞悲当亦君子所不废也以丙申年十二月葬常州府城东横塘乡之原铭曰

惊女鹿佑楚客问天缘何彼姝以此名焉宜其奄忽离瑜复位当景收兰临华罢翠悵悵孙楚蟹行索妃歌离吊梦有涕涟涟{木奈}娥台高玻瓈魂杳定有青鸾集此华表